

Date – 01/12/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Naktipa LADC inthlanpui vote thlak turin inbuatsaihna peih thawkhat a ni a, vawiin tlai atang hian campaign theih hun khar a ni.
2. Mizoram chu ramchhunga sawhthing khawpui-Ginger Capital of India-ah NITI Aayog in a puan thu Mizoram Agricultural Marketing Board thutkhawmah tarlan a ni.
3. Vawiin hi World AIDS Day 2025 a ni a, Mizoram pumah he ni pual hian hun hman a ni.
4. Vawiin atangin Parliament thlasik thutkhawm tan a ni.



LADC ELECTION PREPAREDNESS

Tunkar Nilaini-a Lai Autonomous District Council inthlanpui vote thlak tur buaipuitu tur, Polling Party te vawiin atang khan an Duty na tur hmun an pan tan a, vawiin tlai atang hian campaign theih hun khar a ni bawka ni.

Polling Party chhuak turte hi Lawngtlai District Election Officer, Pu Donny Lalruatsanga chuan DC Office tual atanga vailiamin, inthlanna fel fai leh tluang tak a neih a nih theih nan a theihtawp chhuah turin a chah a. Mahni duty - na tur Polling Station - theuh an thlen hunah report fel fai taka pe turin a chah a ni. DEO - chuan Polling Official - te chu mahni hna chanpual theuh tha taka hlen tura chahin, Tluan tak a mahni Polling Station - theuh pan turin duhsakna a hlan.

MDC bial 25 awmna LADC Inthlanpui neih turah hian Polling Station 111 awmin vawiin khan hmun hla zuala Duty tur tur Polling Party 59 ten an Duty na tur hmun an pan a, naktuk khian Lawngtlai leh a chhehvel a Duty tur ten an Duty na tur hmun an pan ve thung ang.

Vawiin khan campaign theih hun tawp hma hun tlemte chuhin political party te chuan vote an zawng zui a,

MNF Party treasurer Pu Lalruatkima chuan vawiin khan Aizawla thuthar thehdarhtute kawmin, LADC inthlanpui kaihnawihah MCC a bawhchhia nia an hriat avangin ZPM MLA Pu Lalmuanpuia Punte lakah MNF Legal Board chuan hma an lak dawn a ti.

Pu Lalruatkima chuan ZPM MLA Pu Lalmuanpuia Punte chuan official letter head-ah incubation centre sakna tura hnathawk turin LADC inthlan lo awm tura ZPM tana mi tangkai leh candidate thawkrimte duhsak bik an nih dawn thu a ziak tih a sawi a; hei hi MCC bawhchhiatna a nih avangin MNF Legal Board chuan hma an lak dawn thu a sawi bawka.

Aizawl Press Club-ah press conference neiin, Pu Lalruatkima chuan MNF leh Congress sorkar lai khan Autonomous District Council atanga MLA atana thlante chu

sorkarah India flag tar thei dinhmunah dintir an nih thin lain ZPM sorkar hnuaiah chuan ADC pathum atanga ZPM MLA awmchhun chu Ministry-ah dinhmun tha luah tir a ni ve lo a, he hian Lai district mai ni loin Autonomous District Council-te ZPM-in a ngaihthah zia leh a ngaih pawimawh lohzia a tilang chiang hle, a ti.

Congress Party chuan Congress Bhavan-ah Political Session an nei a, he hunah hian MPCC President Pu Lal Thanzara chuan thusawiin LADC inthlannaah Congress a meizanghlaptuah an tel ngei an ring a, phur takin hma an la a ti.

LADC in Congress sorkar lain harsatna an nei ngai lo a ti a, ADC pathum atanga ZPM MLA awmchhun ZPM MLA inb an party tana tha ber tura ruahmanna a lo siamte ZPM thuneitu ten an paihsak bakah, a laina hnai pawh seat an pe lova, ZPM an in set sual hle.

ZPM Party chuan thuchhuah siamin Pu Lalduhoma kaihhruai Sorkar a lo pian atangin Sorkar chuan ADC te enhrang lovin tha takin a thawhpui nghal an ti a. ZPM chuan Sorkar ngelnghet siam a duh avangin bial zawng zawngah candidate a siam kim vek a, Mizoram political party-ah ZPM chiah hi LADC inthlana candidate siamkim awmchhun a ni an ti.

Mipui titi atang chuan Tuichhak atanga Tuithlang thlengin ZPM chu Sorkar siam tura rin hlawh ber a ni chho zel an ti a. Lawngtlai District Headquarters-ah pawh ZPM boruak a sang zel a, Lai faten rilru fim tak hmanga Sorkar ngelnghet, lalna leh thuneihna ringawt buaipuia hmanhlel ni lo, a taka hmasawna hna thawk thei tur ZPM Sorkar ngei din turin an in buatsaih an ti a ni.



MIZORAM GINGER CAPITAL OF INDIA

Mizoram chu ramchhunga sawhthing khawpui-Ginger Capital of India-ah NITI Aayog in puan thu Chief Minister Pu Lalduhoma hova vawiina Mizoram Agricultural Marketing Board thutkhawmah tarlan a ni a,

Thlahlui ni 24 a New Delhi-a neih zawh tak Mizoram sorkar leh NITI Aayog buatsaih Stakeholders Consultation for Mizoram Ginger Produce ah NITI Aayog chuan Mizoram chu "Ginger Capital of India" ah a puang a, sorkar thuchhuah tarlan danin, he meeting hi Mizoram state puala New Delhi-a official meeting lian ber a la nia hriat a ni.

Sorkar laipua Ministry hrang hrang aiawh leh sawhthing leitu leh process-tu investor 60 chuangten Mizoram sawhthing lei leh hralh chungchang inrawnkhawmna an nei a, hei hian Mizoram chu sawhthing quality tha neitu state a nihzia a tichiang hle a, tun hnaiah Mizoram chu India rama sawhthing thar tam state zingah a inhleng chho mek bawh tih sorkar thuchhuah chuan a tarlang a ni,

Vawiina MAMB meeting chuan NITI Aayog chungah lawmthu a sawi a, sawhthing quality tha, chemical laka him ngei tharchhuak tura nasa zawka tan lak zel an rel bawh a. Kum thar lama Organic hmanga sawhthing ching thei tur khuate chu MAMB hnena in-report turin an ngen a, organic-a kalpui thei khuate chu Collection Center kaltlang kher lova, an khuaa leisak dan dap a ni ang. Kumina ching mek zingah pawh organic taka kalpui mek khuate chuan MAMB hi hriattir nghal tur a ni.

Meeting a tarlan anih danin, kumin chhung hian sorkar chuan Sawhthing kg vbc 3 nuai 38 sing 3 & 5,182 a lei a, support price pek chhuah zawng zawng zat chu cheng vbc 137 nuai 72 & 4500 vel a tling a ni.

MAMB hian December ni 5 - 6 hian Aijal Club-ah sawhthing Buyer - Seller Meet nei turin hma a la mek a, India ram hmun hrang hrang atangin hetiang lama tui mite an lo kal khawm dawn a ni.

Meeting chuan State pawn atanga sawhthing Slice Dry lei duh an tam thin avangin Mizo Innovator pahnihte thilsiam Sawhthing channa leh ur rona khawl Rapchung Technology leh Tapchhak Technology khawlte chu Handholding Scheme atanga lei an rel a, a enkawltu turte chu an hnathawh that dan a zira ngaihtuah a ni ang.

Meeting-ah hian Agriculture & Farmers Welfare Minister Pu PC Vanlalruata, Minister, Adviser to CM Dr. KC Lalmalsawmzauva leh MAMB member te an tel a ni.



WORLD AIDS DAY

Vawiin hi World AIDS Day 2025 a ni a, Mizoram pumah he ni pual hian hun hman a ni.

A hmanna pui ber Aizawlah chuan Vanapa Hall-ah Mizoram State AIDS Control Society (MSACS) bultumin, thupui 'Harsatna kara AIDS hmachhawn dan thar' tih a hmangin inkhawm buatsaih a ni a, Assembly Speaker Pu Lalbiakzaman he hun hu a hmanpui a ni.

Pu Lalbiakzama chuan HIV darh zel tur ven kawngah theihtawp chhuah turin Mizoram mipui a ngen a; mutmawh hnarmawha an neih a tul tawh a ti a, khawvelin natna a buaipui langsar tak chu HIV/AIDS niin, India ram state hrang hranga mihring cheng zat atanga chhutin Mizoramah HIV/AIDS vei an tam ber chu a pawl hle a, Mizo Kristianna nen inmil lo takin an inkaichhawna tam ber mipat hmeichhiatna a ni chu a zahthlak hle a ni a ti.

Vanapa Hall-a World AIDS Day hmannaah hian MSACS Project Director Dr. Jane R. Ralte chuan Mizoramah a hmasa ber atan October 1990 khan HIV positive hmuh chhuah a nih thu leh kum 1990 atanga thla lianta October thla thleng khan Mizoramah HIV vei mi 33,641 hmuhchhuah an ni tawh a ti a, Mizorama HIV vei zinga zaa 70 point 3 chu mipat hmeichhiatna atanga kai an nih thu sawiin inchiuna hriau inhmantawm vanga kai zaa 27 point 3, nu-in a faa a kai zaa 1 point 8 leh kaina chhan hriat loh zaa 0 point 74 an ni a ti bawk.

Dr Jane Ralte sawi danin, mipat hmeichhiatna atanga HIV vei zinga zaa 55 point 3 hi kawppuite atanga kai an ni a, hriatchian lohte nena mipat hmeichhiatna hman atanga kai zaa 34 point 3 an awm tih sawiin Sex atanga HIV vei zingah hian mipa mahni anpui kawp atanga inkaichhawng zaa 7 point 7 an awm a; mahni inzuarte atanga kai zaa 2 point 5 an awm thu a sawi bawk.

Dr Jane Ralte chuan sex atanga HIV vei hmuhchhuah zingah kumtin mipa mahni anpui kawp atanga kai an pung chho zel tih

sawiin HIV chu a hlauhawm a, a enkawlna ART damdawi a awm avanga hlau lo an awm thin nia hriat a nih thu sawiin, ART chu natna chak tak hmetmit tura duan a nih avangin a chak a, taksaah side effect hrang hrang a neih thin avangin HIV vei lo tura an nun hmang turin Mizoram mipui, a bikin thalaite a sawm.

World AIDS Day 2025 puala hun hmannaah hian HIV/AIDS dona kawnga thawktha, field hrang hranga nasa taka hmalatu leh bul tantu mi paruk - Dr C. Lalhmingliana, Dr. RL Sanghluna, Dr. Chawnglungmuana, Pi Lalparmawii, Pi Lucy Remruati Chhangte leh Pi Lalmalsawmi te hnenah Khuallian hian chawimawina a hlan a ni.

World AIDS Day pual hian district hrang hrangah hun hman a ni bawk a ni.



ONLINE BORDER CHECK POST

Mizoramah Online Border Check Post Module hman tan a ni dawn a. Hemi pual hian vawiin khan Transport Director Pu R Lalrammawia hoin Transport Directorate Conference Hall-ah hun an hmang.

Director chuan thusawiin, Mizoram Transport Department chuan mipuite tana zangkhai, dik leh awlsam zawka entry tax lak a nih theihna turin theihtawp chhuahin hma a la a, NIC nen tangkawpin tunah hian Online Border Check Post Module hman theih tura peihfel a ni ta a, vawiin atang khan Live server-ah a dah a ni ta a ni a ti.

State dang atanga sumdawnna thila lirthei lo lutten Mizoram an rawn luhin Entry Tax an chawi a ngai a, chu entry tax chu Enforcement Check Gate-a duty ten manual receipt hmangin an la thin a, chu chu Mizoram sorkar chhiahah chhunluh a ni leh thin a. Border Check Post Module hi computer hmanga common portal kaltlanhga online-a awlsam leh dik taka entry tax lakna tur a ni.

Hhe Border Check Post Module hi hmun hnih – Vairengte Enforcement Check Gate leh Kanmun Enforcement Check Gate ah te dah a ni a. Heng hmunah hian state dang lirthei lut rengte chu awlsam takin entry tax an lo la zel tawh dawn a ni.

Tihian, ramchhunga Checkpost Module hmang tawh state 27 zingah Mizoram hi a tel dawn ta a ni.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



EMPOWERING MIZORAM SPORTS

Infiamna lama inkaihhraina mumal zawk a awm theihna tur leh Mizoram pum dapchhuaka thalaite talent hai chhuahna tura sawrkar hmalakna 'Empowering Mizoram Sports' chu vawiin khan Aizawla Ramhlun Indoor Stadiumah Home Minister Pu K Sapdangan a hawng.

Mizoram Sports Council huaihawt he programme ah hian Home Minister chuan thu sawiin Empowering Mizoram Sports (EMS) chu Mizoram tan infiamna lama bungthar pawimawh tak a nih thu a sawi a, sport lama khawvel hriata mizote an inpho chhuah theihna tura hmalakna pawimawh tak a nih thu sawiin kum 2036-a Olympic games lo awm tur atana inbuatsaihna tur a nih thu te, thalaite ruihhlo leh ngawlveina hrang hrang lak atanga chhanchhuahna tur peng pawimawh tak pakhat a nih tur thu a sawi a; awmze nei lehzuala training kalpuina tura duan inkaihhraina, Training Manual pawh a tlangzarh nghal bawk a ni.

Vawiin hun hmannaah hian Sports & Youth Services Department hotute, Mizoram State Sports Council hotute leh sports discipline hrang hranga hruaitute leh trainer te an tel a ni.

Empowering Mizoram Sports programme hnuaiah hian Mizoram hmun hrang hrangah kum 8 - 15 inkarte basic coaching pek an ni dawn a, coaching hi ni 15 chhung atan ni tin darkar 3, a vaiin darkar 45 pek an ni dawn a ni.

Kum 8-15 inkar target an nih chhan hi, kum 2036-a, taksa leh rilru that vanglai thleng tur 'age group' an nih vang a ni a. Mizote thiam zawng, 2036 Olympic Games-a India ram aiawha an tel ve theihna tur nia ngaih sports discipline hrang hrang 24-te thlan a ni.



PARLIAMENT

Vawiin atangin Parliament thlasik thutkhawm tan a ni a.

Lok Sabha ah chuan rorel inkhawm tan ni atangin rorel mumal thei loin house chhungah opposition ten bengchheng an siam a. An thil ngiat zingah Special Intensive Revision of electoral rolls te a tel a. Opposition te bengchheng siam karah hian Union Finance Minister Nirmala Sitharaman-i chuan Central Excise (Amendment) Bill 2025 a pulut a. He bill hian vaihlo leh a kaihhawih thilsiam chhuaha chhiah lak dan thar a rawt a. Pi Sitharamani hain Health Security se National Security Cess Bill 2025 a pulut bawk a. Manipur Goods and Services Tax (Second Amendment) Bill, 2025 a pulut bawk a ni. House chuan Select Committee on the Jan Vishwas (Amendmetn of Provisions) bill, 2025 report siam hunchhung pawtseiin Parliament session tawp ni thleng hun pek an ni a. Select COmmittee-in Insoveny and Bankruptcy Code (Amendment) Bill, 2025 report pek luh hun pawh session tawp thleng a pawtsei a ni.

Vawiin Parliament rorel inkhawm tan ni ah hian session hmasa leh tun session inkara member thi Dharmendra, Col(Retd) Sona Ram Choudhary, Prof, Vijay Kumar Malhotra leh Ravi Naik te sunna hun hman a ni bawk.



PM

Prime Minister Narendra Modia chuan Winter Session chu tihdan phung mai ni loin ram hmasawna tura nawr kaldu a ni a ti. Vawiina Parliament thlasik thutkhawm neih hmaa chanchinbumite hmaah he thu hi sawiin Pu Modia chuan India eibar dinhmun chuan nasa taka hmasawnin dinhmun sang tak a luah a ti a. Hei hian ram changkanga siam tura beihnaah mipuite phurna a pek nasa a ti a. India chuan mipui rorelna in a thlen thil tha te a taka hmuhtheihin a lantir a ni a ti.

Pu Modia chuan party tin te chu an chaklohna avanga thinrim hrikthlakna atana sessioni hman tum loin hnehna changte pawh chapona lantirna hmuna hmang loin a tha zawnga ram siamna hmunah chantir turin a sawm a ni.

